

मार्निंग डोगरी न्यूज़ बुलेटिन, समं. 09-20 Hrs



## Headlines

- 1 उमर अब्दुल्ला कल उपराज्यपाल मनोज सिन्हा होरें गी मिले ते नैशनल कांफ्रेंस दी अगुवाई आले गठबंधन दी सरकार बनाने दा दावा पेश कीता ।
- 2 प्रधानमंत्री इंटरनशिप स्कीम पोर्टल अज्जै थमां पंजीकरण लेई खुल्ली ।
- 3 बुराई पर अच्छाई दी जित्त दा प्रतीक, दशैहरे दा ध्यार अज्ज मुख भरै च जोश ते जज्बे कन्नै मनाया जा'रदा ऐ ।
- 4 भारत बंगलादेश बश्कार मजूदा श्रृंखला दा त्रीया ते खीरी टी-20 क्रिकेट मैच अज्ज हैदराबाद च खेड्डेआ जाग ।



## **JK-Govt. Formation**

नैशनल कांफ्रेंस दी अगुवाई आले गठबंधन नै जम्मू कश्मीर च सरकार बनाने दा दावा पेश कीता ऐ । नैशनल कांफ्रेंस दे उप-प्रधान उमर अब्दुल्ला होर कल संजा श्रीनगर राजभवन च उपराज्यपाल मनोज सिन्हा होरें गी मिले ते अपने भ्याल समर्थकें कांग्रेस, आम आदमी पार्टी ते सीपीआई(एम) ते किश आजाद मेदवारें दे समर्थन पत्र बी उनेंगी सौंपे । जम्मू कश्मीर च 10 ब'रें दे वक्फे परैंत 90 मिंबरी विधानसभा लेई चुनां करोआए गे न । उपराज्यपाल होरें गी मिलने परैंत पत्रकारें कन्नै गल्लबात करदे होई उमर अब्दुल्ला होरें आखेआ जे उनें शपथ ग्रेहण समारोह लेई कोई ध्याड़ा तैह करने दी गुजारश कीती ऐ ।



## **Reddy 370**

केन्द्री मंत्री जी.रेड्डी होरें आखेआ ऐ जे केन्द्र जम्मू कश्मीर दे राज्य दा दर्जा ब्हाल करने दी मंग पर बेल्ले सिर बनकदे समें पर प्रतिक्रिया देग । उआं उनें जोर देइयै आखेआ जे दफा 370 जम्मू कश्मीर च परतियै लागू नेई कीता जाग । जम्मू कश्मीर विधानसभा चुनाएं लेई बीजेपी दे प्रभारी श्री रेड्डी होरें नैशनल कांफ्रेंस आस्सेआ

राज्य दा दर्जा ब्हाल करने दी गल्ल बारे पुच्छे गेदे इक सुआले दे परते च आखेआ जे राज्य दा दर्जा ब्हाल करने दा फैसला सेई समें लैता जाग।



## PM Internship

प्रधानमंत्री इंटरनशिप योजना दे पोर्टल पर अजें तगर 193 कंपनिएं तकरीबन 91 ज्हार इंटरनशिप दे मौके उपलब्ध करोआए न। सरकार आस्सेआ इस म्हीने दी 3 तरीक गी टकोह्दे तौरा पर रंभ कीते गेदे पोर्टल अज्ज आवेदके दे पर्जीकरण लेई खोली दिक्ती जाग। पोर्टल गी कंपनिएं लेई मौके उपलब्ध करोआने आस्तै खोलेआ गेआ ऐ। सरकार दा लक्ष्य माली ब'रे 2024–25 दरान 1.25 लक्ख इंटरनशिप दे मौके उपलब्ध करोआया ऐ। इसी ऑनलाइन पोर्टल [pminternship.mca.gov.in](http://pminternship.mca.gov.in) रायं लागू कीता जाग। इस परियोजना दी कुल लागत 800 करोड़ रपे होग। मेदवार अज्ज थमां लेइयै इस म्हीने दी 25 तरीक तगर पोर्टल राएं इंटरनशिप लेई आवेदन करी सकदे न।



## GOC

सेना दी 16 कोर दे जीओसी लैफ्टिनेंट जनरल नवीन सचदेवा होरें जम्मू कश्मीर दे डोडा जिले च ग्राउंड जीरो पर तैनात फौजिएं दी अभियान सरबंधी तैआरिएं ते सुरक्षा स्थिति दा कल जायजा लैता। व्हाइट नाइट कोर नै सोशल मीडिया प्लेटफार्म एक्स पर दस्सेआ जे जनरल सचदेवा होरें आतंकवाद कन्नै निबड़ने आस्तै टकोह्दा बले डेल्टा कन्नै रलियै इलाके च आतंकवाद विरोधी तैआरिएं दी समीक्षा करने दे मकसद कन्नै डोडे दा दौरा लाया। एह्दे शा पैहले बुधवार ते वीरवार गी जीओसी होरें इस्सै चाल्ली राजौरी ते अखनूर दे अगेत्रे इलाकें दा दौरा लाया हा।



## Income Tax Collection

इंकम टैक्स मैहकमे ने माली ब'रा 2024–25 ताईं अजें तगर प्रतक्ख कर दे तौरा पर 13 लक्ख 57 ज्हार करोड़ रपे शा बद्ध दी रकम जमा कीती ऐ। एह्दे च 7 लक्ख करोड़ रपे शा बद्ध व्यक्तिगत इंकम टैक्स ते 6 लक्ख करोड़ रपे शा बद्ध कारपोरेट टैक्स शामिल ऐ। मैहकमे नै कल तगर दो लक्ख 31 ज्हार करोड़ रपे शा बद्ध दा रिफंड बी जारी कीता। इस माली ब'रे च पतक्ख कर संग्रह च 18 प्रतिशत शा बद्ध दा टकोह्दा बाद्धा दर्ज कीता गेआ ऐ।



## BRO Projects

रक्षा मंत्री राजनाथ सिंह होरें अज्ज सीमा सड़क संगठन बीआरओ आस्सेआ तैआर कीते गेदिएं 75 ढांचागत परियोजनाएं गी देसे दे नमित करगंन ते किश दा नीह पत्थर रक्खगंन। 2 ज्हार 276 करोड़ रपे मुल्ल दिएं इनें परियोजनाएं चा 19 जम्मू कश्मीर, 11 लद्दाख, 18 अरुणाचल प्रदेश, 9 उत्तराखंड, 6 सिक्किम, 5 हिमाचल प्रदेश, पच्छिम बंगाल ते राजस्थान च 2-2 ते 1-1 नागालैंड, मिजोरम ते अंडेमान निकोबार द्वीप समूह च न। इनें परियोजनाएं दे कन्नै गै बीआरओ दिएं इस ब'रे दिएं ढांचागत परियोजनाएं दी गिनतरी 111 होईं गेईं ऐ, जिंदी कुल लागत 3 ज्हार 751 करोड़ रपे ऐ। पिछले ब'रे बीआरओ नै 125 ढांचागत परियोजना तैआर करियै देसे दे नमित कीतियां हियां, जिंदे पर 3 ज्हार 611 करोड़ रपे दा खर्च आया हा।



## Dussehra

मुल्खै दे बाकी हिस्से आला लेखा समूलचे जम्मू प्रांतै च बी दशैहरे दा ध्यार अज्ज मनाया जा'रदा ऐ। एह ध्यार भगवान राम हुंदी रावण पर जित्त दे चेतै च मनाया जंदा ऐ जेहूड़ा जे बुराई पर अच्छाई दी जित्त दी प्रतीक बी ऐ। शारदी नरातें दे ते दुर्गा पूजा दे सम्पन्न होने पर दशैहरे दा ध्यार मनाया लंदा ऐ। राष्ट्रपति द्रौपदी मुर्मू होरें सब्बनें गी दशैहरे दी ममारकबाद दिंदे होईं आखेआ जे एह ध्याड़ा बेनयायी पर न्याय दी जित्त दा प्रतीक ऐ। प्रधानमंत्री नरेन्द्र मोदी होरें बी दशैहरे दी ममारकबाद दिंदे होईं कामना कीती जे मां दुर्गा ते प्रभु श्रीराम हुंदे शीरवाद कन्नै सब्बनें गी जीवन दे हर क्षेत्र च कामयाबी हासल होए। जम्मू कश्मीर दे उपराज्यपाल मनोज सिन्हा होरें बी लोकें गी विजय दशमी दियां शुभकामनां दिंदे होईं आखेआ जे हर कुसै गी भगवान राम दिएं सिक्खयाएं ते आदर्श पर अमल करदे होईं समाज दी भलाई बेहतरी लेईं कम्म करना लोड़चदा।



## Shilp Bazar

जम्मू दे डिवीजनल कमीशनर रमेश कुमार होरें जम्मू हॉट डोगरा चौक च बेमिसाल हस्तशिल्प ते हत्थखड्डी उत्पाद दी 7 दिन चलने आली प्रदर्शनी गांधी शिल्प बजार दा कल उद्घाटन कीता। इस कार्यक्रम दा सरिस्ता हस्तशिला मैहकमे दे विकासायुक्त भारत सरकार दे कपड़ा मंत्रालय हत्सशिल्प सेवा केन्द्र जम्मू आस्सेआ कीता जा'रदा ऐ। भारत दे बक्ख-बक्ख हिस्से थमां आए दे 50 कारीगिरें ते बुनकर जंदे रोल 11 थमां 17 अक्टूबर तगर जम्मू हॉट च बिक्री तैहत अपनिएं चीजें बस्तें दस्सियै शिल्प कला दा प्रदर्शन करा करदे न। इस मौके पर बोलदे होईं डिवीजनल कमीशनर होरें मैहकमे दिएं कोश्टें गी सराहना कीती ते जोर देइयै आखेआ जे कारीगिरे-बुनकरें गी बजारी मंच प्रदान करने लेईं इस चाल्ली दे कार्यक्रमें दा सरिस्ता नियमित तौरा पर कीते

जाना लोडचदा ऐ। हस्तशिल्प सेवा केन्द्र जम्मू दियां सहायक निदेशक अंबिका संबेयाल होरें मंडलायुक्त होरें गी अवगत करोआया जे प्रदर्शनी च बसोहली शाल, प्शमीना शाल, कश्मीरी कढ़ाई, बसोहली पेंटिंग, बिन्ना क्राफ्ट बगौरा दस्सेआ जा'रदा ऐ।



## Basohli Utsav

खित्ते दी शानदार विरासत दा जश्न मनाने आला सांस्कृतिक कार्यक्रम बसोहली उत्सव अपने अपने बक्ख-बक्ख रंगे कन्नै लोकें दा मन परचा करदा ऐ। एहदा मुकख आकर्षण कदुआ जिला प्रशासन आस्सेआ आयोजित मेगा लेजर शो हा जिने रामलीला मैदान च बड़े बड़डे किट्ठे दा मन मोही लैता। इत्थें गै संजा लै रिवायती डोगरी गीतरुएं ते सिठानियें इस उत्सव गी होर बी शानदार बनाई दित्ता।



## World Arthritis Day

अज्ज विश्व गठिया दिवस ऐ। हड्डिएं रोग बक्खी लोकें गी जागरूक करने लेई एह ध्याड़ा हर ब'रे 12 अक्टूबर गी मनाया जंदा ऐ। इस ब'रे दा सिरलेख ऐ सूचित विकल्व बेहतर परिणाम। डाक्टरें रोगिएं ते आम लोकें गी सलाह दित्ती जे ओ सोशल मीडिया पलेटफार्म थमां सामग्री पदियै आपूं अपना लाज नेई करन जेहदे कन्नै खतरा बददी जंदा ऐ।



## Men's Cricket

भारत ते बंगलादेश बश्कार 3 टी-20 क्रिकेट मैच दी श्रृंखला दा त्रीया ते खीरी मैच अज्ज संजा हैदराबाद च होग। मैच संजा 7 बजे शुरू होना ऐ। उआं पैहले दवै मैच जित्तियै भारत श्रृंखला पैहले गै अपने नां करी चुके दा ऐ पर फही बी 3-0 दी जित्त दर्ज करने लेई ओ अज्जै दा मैच बी जित्तने लेई पूरी कोश्ट करोग। ग्वालियर च खेड्डेआ गेदा पैहला मैच भारत नै 7एंकिकटें कन्नै जित्तेआ हा। जिसलै जे दिल्ली च खेड्डे गेदे दुए मैच च भारत नै महमान टीम गी 86 रंजें कन्नै शिकस्त दित्ती ही। तोआई बीसीसीआई नै 16 अक्टूबर कोला न्यूजीलैंड कन्नै खेड्डे जाने आली त्रै टैस्ट मैचें दी श्रृंखला लेई भारतीय टीम दी घोशणा करी दित्ती ऐ। बीसीसीआई नै कल जारी इक ब्यान च आखेआ जे रोहित शर्मा टीम दे कप्तान ते जसप्रीत बुमराह उप कप्तान होंगन।

